

Gehppes, álkis, suohtas čájáhus

Go čohkkájin teáhtersálas Beaivváža ođđa čájáhusain Duste dievddu, bođi dávjá jurdda: In go leat su oaidnán ovdal, samvirkelága šiljus dahje eará sajes ? Sámi dievddut ledje lávken márkanšiljus teáhterlávdaí.

Neaktárat: Anita Suikkari, Sara Margrethe Oskal, Irene Länsmann, Svein Birger Olsen ja Egil Keskitalo gii maiddá lei musihkár ja musihkkadahkki.

Bagadalli: Alex Sherphf.

Beaivváš lea dál mátkkis ođđa teáhterčájálmásain, Duste dievddu. Go oainnat čájálmasa nama, Duste dievddu, orrot dego gahččame dievddut geaid birra čájálmas lea, go dáid šaddá dustet. Muhto dát dievddut eai gal leat gahččame, dan gal oinniimet. Maiddá oaidnit ahte orro dego livččii ovdal oaidnán olbmuid geat dán čájáhusas leat sámi dievddut. Sámvirkelága šiljus, káfeain ja márkanbáikkiin muđui. Eahpitkeahhtá leat oaidnán muhtima gii heive čájálmasa sámi dievdduide.

Čájálmasa buorre álgu buvttii vuordámušaid čájálmassii. Sámi dievddu riegádeapmi, mii álgahii čájálmasa, lei kreatiivvalaččat ja miellagiddevaččat ráhkaduvvon. Dása váikkuhii ollu čuovga-, suovva- ja musihkka geavaheapmi (jietnagaevaheap-

mi ?) mii dagai álggu duohta gelddolažžan. Muhto manjel buori álggu, nogai gelddolašvuohta čájáhusas. Sámi dievdu riegádii suohpaniin falahagas ja niibeboahkániin, ja dalle ferte leat bozosámi dievdu mas lea sáhka. Guhkes ságastallan čájálmasa álggugeahčen ovtta sámi dievddus, gii lei Irene Länsman, lei ilá guhkki ja láittas. Dán lei oazžut goit beliin unnidit.

Neaktárat, geat ledje nissonolbmot geat nekte dievdun, ja dievddut geat nekte nissonolmmožin, barge buori barggu. Earenoamážit ferte namuhit Anita Suikkarii, gii ferte duođalaččat ja guhká studeren sámi dievdduid. Suikkari barggai nana buori barggu, ja máhtii dulkot sámi dievddu nu čehpet, ahte muhtomin eahpidii lei go dá nissonolmmoš. Dievddu lihkanvugiid ja leahkinvuogi earenoamášvuohta deattuhuvvui nu bures, ahte šattái sihke jáhkehahtti, muhto aktanis suohtas. Maiddá Sara Margrethe Oskal ferte namuhuvvot. Dál son

lea viimmat ožžon rolla mas beasai čájehit maid son máhtta. Ja ahte son máhtta, ii várra eahpit oktage manjel čájálmasa.

Earenoamáš dán čájálmasas lei filbmageavaheapmi, mii čájehe sámi dievdduid jurdagiid ja sávaldagaid. Dát doaimmai bures, ja attii gehččiide buori vuođu ipmirdit manin dievddut ledje nu go ledje. Maiddá lei dát vuohki ođas ja earálágan Beavváža čájálmásain. Loahpas sáhtta dadjat ahte viimmat lea Beavvážis giella álgán šaddat buorre. Teáhter lea váldán vuhtii cuigodemiid, mat leat bohtán teáhterii, ii dušše giela dáfus. Ja dalle ferte šaddat ovdáneapmi. Čájálmas lei muđui álki ja suohtas. Dás lei geahppa humora, mii heive eatnasiidda. Vaikko dát ii leat čájálmas mainna bohtá Beavváš ovttage muitogirjiide čállojuvvot, lea dát somá ja geahččanveara. Gehppes, álkis bihtta mas lea juoga suohtas buohkaide.

Simit-Ristena
Håkon Issát



Sámi dievddu riegádeapmi lei sihke kreatiivvalaččat ja miellagiddevaččat ráhkaduvvon. Buorre álgu mii buvttii lohpadusaid ođđa Beavváža bihtái, Duste dievddu.
(Govva: Harry Johansen)